

Uunga siunnersuut:

Kalaallit Nunaanni piffissap suliffiusartup sapaatip akunneranut nalunaaquttap akunnerinit 40-nit sapaatip akunneranut nalunaaquttap akunnerinut 35-inut 37-inulluunniit appartinneqarnerata aningaasaqarnikkut, inuiaqatigiinnut peqqissutsimullu kingunerisassaanik misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup inerneru 1. januar 2027-iutinnagu Inatsisartunut agguanneqassaaq

Karen Marie Kyed Frederiksenimit siunnersuutigineqartoq

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Mariane Paviassen Jensen, Inuit Ataqaatigiit, siulittaasooq

Inatsisartunut ilaasortaq Juno Berthelsen, Naleraq, siulittaasup tullia

Inatsisartunut ilaasortaq Hans-Erik Enoksen, Demokratit

Inatsisartunut ilaasortaq Lars Poulsen, Siumut

Inatsisartunut ilaasortaq Aqqalu C. Jerimiassen, Atassut

UKA2025-mi ulloq 14. oktober 2025 siullermeerinninnerup kingorna ataatsimiititaliap siunnersuut misissuataarpaa.

Siunnersuutip imarisaa siunertaalu

Piffissap suliffiusartup sapaatip akunneranut nalunaaquttap akunnerinit 40-nit sapaatip akunneranut nalunaaquttap akunnerinut 35-inut 37-inulluunniit appartinneqarnerata aningaasaqarnikkut, inuiaqatigiinnut peqqissutsimullu kingunerisassaanik misissueqqullugit Naalakkersuisut peqquneqarnissaat pillugu siunnersuummi siunertarineqarpoq.

Siunnersuutip Inatsisartunit siullermeerneqarnera

Siunnersuutip siullermeerneqarnerani misissuinissamat aallartitsinissamat piffissaq naleqquttuusooq pillugu isumaqatigiinneq pingaarnerusimavoq siammasissumillu oqallisigineqarluni.

Siunnersuutip siullermeerneqarnerani ilaatigut pissutsit makku eqqartorneqarput:

- Ilumut sulinermi piffissaritinneqartoq inatsisigut aaqqinneqartariaqarnersoq, imaluunniit suliffeqarfiit isumaqatiginninniarnannut attuumanersoq nalilissagaat.
- Piffissaq suliffiusoq appartinneqarsinnaanersoq akissarsiatigut sulisup akissarsiaanut apparsaataanngitsumik.
- Sulisut suliarisartakkaminnut tunngatillugu naammassisaqartarnerunissaat eqqarsaatigalugu, ilumut piviusorsioruunersoq sulinermut piffissap atorneqartartup appartinneqarnissaa.
- Sulisitsisumut sulinerup appartinneqarnera aningaasartuutunik nassataqassanersoq.
- Napparsimanernut, sulinermilu atukkanut assigisaannullu sulinerup appartinneqarnera pitsaasumik sunniuteqassanersoq.
- Tiimimusialinnut qaammamusialinnullu sulinermi piffissap allangortinneqarnissaanut periarfissaq assigiinngissuseqarnersoq.
- Sulinermi piffissarititaasup aalajangerneqarnera nunap immikkoortuani suatungaaniinneq apeqqutaanersoq.
- Attuumassuteqarsinnaasut tamaasa ilaatinneqarnissaat pingaaruteqartoq naqissuserneqassaaq, uani assersuutigalugu suliffissarsiuussisarnermi suleqatit, namminersortuni suliffeqarfiutillit aamma Sulisitsisut.

Siunnersuut tamanna tunuliaqutaralugu Inuussutissarsiornermut Aatsitassanullu Ataatsimiititaliamut suliannarlugu ingerlateqqinneqarpoq.

Ilisimatitsissut

Ilanngussaq 1 malillugu, piffissaq suliffik pillugu UKA2025-mi imm. 58-imut tunngatillugu misilittakkat pillugit ilisimatitsissut Aningaasaqarnermut Akileraartarnermullu Naalakkersuisup 11. februar 2026 ataatsimiititaliamut nassiunnikuuaa.

Piffissaq suliffik inatsisitigut toqqaannartumik immikkut malittarisassiorneqanngitsoq ilaatigut tikkuartorneqartoq malittarisassanut maanna atuuttunut suliffik maanna atuuttoq pillugu aalajangersakkami ilisimatitsissutip imaanik misissuinermik imaqarpoq. Piffissaq suliffik, feriarneq pillugu inatsimmi, sapaatip akunneranut ataatsimut 40 tiiminut aalajangerneqartoq allaqqavoq.

Ilisimatitsissut aamma immikkoortumik piffissap suliffiup allangortinnissaanut periarfissanik imaqarpoq. Suliffiup allangortinneqarnissaanut siullertut feriarnermut inatsisip aaqqissuuteqqinneqarnissaanut attuumassuteqassasoq naalakkersuisoqarfik tassunga atatillugu ilisimatitsivoq.

Pisortani piffissap suliffiusup appartinneqarnissaanik siornatigut misissueqqissaarnerit imaluunniit misileraanerit ingerlanneqarsimangitsut naalakkersuisoqarfiup ilanngullugu ilisimatitsissutigaa, taamaattumillu piffissap suliffiusup appartinneqaratarsinnaaneranut inuiaqatigiinni aningaasaqarnikkut, sulinikkut aammalu suliffikkaartumik sunniutaasa misissorneqarnissaat kissaatiginarpoq.

Siunnersuutip aningaasatigut kingunerisassai

Aalajangiiffigisassatut siunnersuutip piviusunngortinnissaanut aningaasatigut allaffissornikkullu kingunerisassai siunnersuummi tunngavilersuutitut allassimasussaasut Inatsisartut suleriaasianni § 33, imm. 1-imi allassimavoq.

Atorfilittap ukiumut sulinerminut akissarsiai 500.000 koruunit qaangernissaat naatsorsuutigineqanngitsoq allaffissornikkut aningaasatigullu kingunerisassai pillugit nalilerneqarsimavoq, tamannalu siunnersuutip piviusunngortinnissaanut aningaasatigut kingunerisinnaasai pillugit naapertuuttoq ataatsimiititaliamit nalilerneqarpoq.

Ataatsimiititaliap siunnersuummut oqaaseqaatai

Aalajangiiffigisassatut siunnersuummi piffissap suliffiup appartinneqarnissaanut kingunerisassaasa misissorneqarnissaat pillugu siunnersuutaasoq kingusinnerusukkut apeqqutip oqallisigineqarnissaanut aallaaviusinnaasutut ataatsimiititaliap maluginiarpaa.

Siunnersuutigineqaqqaarami 1. januar 2027-mut piffissamik killilerneqarsimasoq ataatsimiititaliap ilanngullugu maluginiarpaa.

Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqatigiinniit, Demokratiniit Siumumiillu siunnersuut akuerineqartussanngorlugu innersuussutigineqarpoq.

Taamatut oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Mariane Paviasen Jensen
Siulittaasoq

Juno Berthelsen
Siulittaasup tullia

Hans-Erik Enoksen

Lars Poulsen

Aqqalu C. Jerimiassen